

Fas Jon

Nægkiariien sə rani mə nəfe i nəkukuə

Jon in aposol riti sə Iesu rokeikei pik. In rirai nəkukuə me i Jon, Fas Jon, Seken Jon, mine Namba Tri Jon. In rirai nəkukuə me nəha ipaka ti nuk 90. Fas Jon rəvəhag m nakalasia me mini mə irəha tuhaməkeikei mhəsiari ti nahatən eikuə me kamo nahatən eikuə me həkoui irapw irəha ia suatuk atukwatukw. Nahatən eikuə me nəha kamhəni mə Iesu ripko mhə in Kristo, Tini Kumwesən. Həni mə Kumwesən ripkuvehe mhə mo in iərmama rəmwhen ia kitaha. Jon rokeikei mə nakalasia me tuhəukurən mə Iesu in Kumwesən mine in mwi iərmama. Jon rokeikei mə truvehi utə nətərigien səvəi nakalasia me pwəh hərer əknekın ia nahatətəien səvənraha ia Iesu Kristo mamho nokeikeien. In rini mə kitaha tsaməkeikei mhokeikei kitaha me, mamhəsiai nəgkiariien me səvəi Kumwesən. Trini minuə samo iamınha irə, səukurən mə kitaha nipwnəti Kumwesən me.

Nægkiariien səvəi Nimiruien

¹ Nægkiariien i səkimaha raməvisau Nægkiariien sə rinarə raka fwe tui nəpın tıprənə ramiwən ihi. Kimaha iahəuvəregi raka Nægkiariien nəha, mhətoni ia nənimemaha, mhəspau irə, mhərapı ia rəgimaha. Nægkiariien nəha in Nimiruien.

² Nimiruien i riməier pehe tukumaha. Kimaha

iahənətoni mhəukurən mə in nɪpərhiēnien. Nənə təkwtəkwi ni iahaməni irapw Nimiruiēn Rerɪn i tukumiaha. Fwe kupwən in rɪnamarə irau Tata Kumwesən, nənə marə mier pehe tukumaha. ³ Iahaməni irapw tukumiaha narimnari me i iahənətoni mhəregi mə kɪmiaha tihəuvehe mho pəri nari kitaha m kɪmiaha. Pərhiēn kɪmaha iahamo pəri nari kɪmaha Tata Kumwesən mɪne Tɪni, Iesu Kristo. ⁴ Nəgkiariēn me i iahamrai rauvehe tukumiaha mə tro rerimaha ragien.

Navəniēn ia nukuraanien

⁵ Nəgkiariēn i kɪmaha iahəregi in rɪməni pehe tukumaha, nənə iahaməni pehe tukumiaha, mə Kumwesən in nukuraanien nəpitəvien riwən anan irə. ⁶ Trɪni mɪnuə kitaha səni mə samo pəri nari kitaha min, mətə ia navəniēn səkitaha samavən ia nəpitəvien, nənə sameikuə. Noien səkitaha ripkesi pen mhə nəgkiariēn sə ro nɪpərhiēnien. ⁷ Mətə trɪni mɪnuə ia navəniēn səkitaha samavən ia nukuraanien rəmwhen in ramarə ia nukuraanien, nənə kitaha samo pəri nari, nite Tɪni, Iesu, ramaikuas raka noien ərəha me pam səkitaha, mo kitaha səmher. ⁸ Trɪni mɪnuə kitaha səni mə səpko mhə noien ərəha, sameikuə atukw a ia kitaha me, nənə nəgkiariēn sə ro nɪpərhiēnien riwən ia kitaha. ⁹ Mətə kitaha səukurən nətigiteien ia Kumwesən, noien səvənhi ratukwatukw. Ro iamɪnhi irə, trɪni mɪnuə səni irapw noien ərəha me səkitaha min, nənə in trenouenou noien ərəha me səkitaha, maikuas raka noien me pam i səno

1:4: Jon 16:24

1:5: 1Tim 6:16, Jem 1:17

1:6: 1Jon 2:4

1:7: Jon 3:21, Aes 2:5, Hip 9:14, Rev 1:5, 7:14

1:8: Sam 32:5,

Prov 28:13

həpkatukwatukw mhə, mo kitaha səmher. ¹⁰ Trini minuə kitaha səni mə səpko mhə noien ərəha, samo Kumwesən mə in ieikuə riti, nənə nəgkiariien səvənhi riwən ia kitaha.

2

¹ Nipwnətik me. Iakamrai nəgkiariien me i tukumiaha məminise kimiaha mə tihəpwəh noien ərəha. Mətə trini minuə iərmama riti ro noien ərəha, iərmama riti nəha ikın trasitu ia kitaha, məkari tukwini səkitaha m Tata Kumwesən. Iərmama nəha in nəha Iesu Kristo, in iəmə atukwatukw. ² In remhə niten raikuas raka noien ərəha me səkitaha. In ripkəmhə mhə mə niten traikuas raka əpa noien ərəha me səkitaha, mətə in remhə mwi mə niten traikuas raka noien ərəha me səvəi nərmama me ia tənəmtənə me pam.

³ Kitaha səfukurən mə səuvəuvehe mhəuvəukurən pərhien Kumwesən? Trini minuə samo nəgkiariien me səvənhi, noien nəha ramahatən pen. ⁴ Iərmama sə rani mə in rukurən Kumwesən mətə ripko mhə nəgkiariien me səvənhi, in ieikuə, nənə nəgkiariien sə ro nipərhienien riwən irə. ⁵ Mətə trini minuə iərmama riti ramo nəgkiariien səvəi Kumwesən, in pərhien iərmama i ramokeikei Kumwesən ia noien sə ratukwatukw pam. Kitaha səfukurən mə səpwit əknekın ia Kumwesən? Noien i sə takini ramahatən pen. ⁶ Iərmama sə rani mə in rəpwit əknekın ia Kumwesən traməkeikei mavən ia navənien kuatia nəha Iesu rinavən irə.

Nəgkiariien vi

2:1: Hip 7:25, 9:24 **2:2:** Jon 1:29, 11:52, Kol 1:20, 1Jon 4:10,14

2:4: 1Jon 1:6,8

⁷ Nipwnətik keikei me. Nəgkiariien i iakamrai m kımiaha rıpkō mhə nəgkiariien vi riti, mətə in nəgkiariien akuas sə hiəuvəregi raka kınani fwe nukunen. Nəgkiariien akuas i in nəgkiariien i sə hiəuvəregi raka. ⁸ Mətə ia nətoniien riti mwi, nəgkiariien i iakamrai rauvehe tukumiaha, in nəgkiariien vi. Kınətoni ia suatuk vi riti ia nimiruien səvəi Iesu mine səkimiaha ti nəri nə mə nəpitəvien rınakurau mamevən, nukuraanien pərhiēn ruvəuvehe maməhiapw.

⁹ Iərmama sə rani mə in ramarə ia nukuraanien mətə raməmwəki piəvni, in ramarə ihi ia nəpitəvien. ¹⁰ Iərmama sə ramokeikei piəvni in ramarə ia nukuraanien, nənə nari riti riwən ia narəien səvənhi tro in rapəti mımwei. ¹¹ Mətə iərmama sə raməmwəki piəvni in ramarə ia nəpitəvien, mamavən ia nəpitəvien, mireirei kwopun ramevən ikın, ti nəri nə mə nəpitəvien rəuiui nənimen.

¹² Nəkwərhakwərha me. Iakamrai nəgkiariien i rauvehe tukumiaha,
ti nəri nə mə Kumwesən rinenouenou raka noien ərəha me səkimiaha ti nəri Iesu rino.

¹³ Tata me. Iakamrai nəgkiariien i rauvehe tukumiaha,
ti nəri nə mə kımiaha hiəuvəukurən raka Iərmama sə rınarə raka fwe tui nəpın tiprənə ramiwən ihi.

Ntəmaruə me. Iakamrai nəgkiariien i rauvehe tukumiaha,

2:7: 2Jon 5-6, 1Jon 2:24, 3:11 **2:8:** Jon 13:34, Rom 13:12, Jon 1:9 **2:9:** 1Jon 3:10,15, 1Jon 4:20 **2:10:** Jon 11:9, Rom 14:13
2:11: Jon 11:10, 12:35 **2:12:** 1Kor 6:11 **2:13:** 1Jon 1:1

ti nəri nə mə kımiaha hiəuvəuvehi irapw raka
niskaiien səvəi iəremhə ərəha Setan.

14 Nəkwərhakwərha me. Iakamrai nəgkiariien i
rauvehə tukumiaha,
ti nəri nə mə kımiaha hiəuvəukurən raka Tata
Kumwesən.

Tata me. Iakamrai nəgkiariien i rauvehə tukumi-
aha,

ti nəri nə mə kımiaha hiəuvəukurən raka
Iərmama sə rınarə raka fwe tui nəpın
tıprənə ramiwən ihi.

Ntəmaruə me. Iakamrai nəgkiariien i rauvehə
tukumiaha,

ti nəri nə mə kımiaha hiəskai,
nəgkiariien səvəi Kumwesən ramarə ia
rerımiaha,
nənə hiəuvəuvehi irapw raka niskaiien səvəi
iəremhə ərəha Setan.

Tıprənə i mine noien me kamo ia tıprənə i

15 Tihəpwəh nokeikeiien noien me səvəi tıprənə
i uə narimnari me səvəi tıprənə i. Trini minuə
iərmama riti rokeikei noien me səvəi tıprənə
i, in rıpkokeikei pərhiən mhə Tata Kumwesən.

16 Iakani iamınhi irə ti nəri nə mə nəpın me pam
nərmama me səvəi tıprənə i kamho nəfe noien
ərəha nıpwranraha rokeikei. Nəpın me pam
rerınraha ramevən ia nəfe nənimenraha rətoni
hokeikei mə tuhəuvehi. Irəha kamhərpwi irəha ti
nautə me səvənraha. Noien me pam nəha həpkuku
pen mhə ti Tata Kumwesən, mətə kamhəuku pen
ti tıprənə i. 17 Noien me səvəi tıprənə i mine
narimnari me nərmama səvəi tıprənə i hokeikei

hənaməuvehe tuhəiwən, mətə iərmama sə ramo
nəkwei Tata Kumwesən ramarə rerin.

Profet eikuə me

¹⁸ Nipwnətik me. Nəpɪn sampam i samarə irə.
Kimiaha hiəuvəregi raka mə iərmama riti tru-
vehe məmwəki pik Kristo. Təkwtəkwuni mine
nəha nərmama həpik səməme kamhəmwəki pik
Kristo həuvəuvehe raka. Noien i ro nukurəniēn
i tukutaha səukurən mə pərhien nəpɪn sampam i
samarə irə. ¹⁹ Nərmama me nəha hənəpwəh kitaha
mhəier, ti nəri nə mə ripko mhə irəha nərmama
me pərhien səkitaha. Trini minuə irəha nərmama
pərhien me səkitaha ko kamhəripɪn, mamharə
kitaha minraha. Mətə irəha hənəpwəh kitaha
mhəier, mho nukurəniēn i mə ripko mhə irəha
nərmama me pərhien səkitaha.

²⁰ Mətə kimiaha hiəuvəuvehi raka Nənimwɪn
i Kristo Ikinan rinətəgi pen ia kimiaha, ro pen
kimiaha pam hiəuvəukurən nari. ²¹ Ripko mhə
iakamrai nəgkariien i rauvehe tukumiaha ti
nəri nə mə kimiaha hiəreirei nəgkariien sə ro
nipərhienien, rekəm. Mətə iakamrai nəgkariien
i rauvehe tukumiaha ti nəri nə mə hiəuvəukurən
raka nəgkariien sə ro nipərhienien, nənə
hiəukurən mwi mə neikuəien riti ko ripkuku pen
mhə irə. ²² Sin in ieikuə? Iərmama sə rani mə ripko
mhə Iesu in Kristo in ieikuə. Iərmama iamɪnha
irə in raməmwəki pik Kristo, mani neikuəien ia
Tata Kumwesən mine Tini. ²³ Iərmama sə rani
neikuəien ia Tini Kumwesən, Tata Kumwesən

2:18: 1Tes 4:7, Mat 24:5,24, 2Jon 7 **2:19:** Wok Me 20:30, 1Kor
11:19 **2:20:** 1Kor 2:15, 1Jon 2:27 **2:22:** 1Jon 4:3, 2Jon 7
2:23: Jon 5:23, 15:23, 1Jon 4:15, 5:1, 2Jon 9

ripkarə mhə tukwe. Mətə iərmama sə rani irapw Tini Kumwesən, Tata Kumwesən in mwi ramarə tukwe.

²⁴ Nəgkiariien nəha kimiaha hiəməregi kinani fwe nukunen tihətui amasan tukwe pwəh rəpwit əknekɪn ia rerimiahə ia nəpɪn me. Trini minuə nəgkiariien nəha hiəməregi kinani fwe nukunen rəpwit əknekɪn ia rerimiahə nəpɪn me, kimiaha mwi tihəpwit əknekɪn ia Tini Kumwesən mine Tata səvənhi. ²⁵ Nənə in i nəri Kumwesən riməni mə traməkeikei muvei pehe m kitaha: nimiruien rerin.

²⁶ Iakamrai nəgkiariien i rauvehe tukumiahə, maməgkiari ia nərmama me nəha səməme kamhəmwur mə tuheikuə ia kimiaha. ²⁷ Kimiaha hiəuvəuvehi raka Nənimwɪn sə Kristo rinətəgi pen ia kimiaha. Nənimwɪn nəha rinərə raka ia kimiaha ro pen hiəpkətui mhə mwi iərmama riti mə trahatən kimiaha. Mətə nənimwɪn sə Kristo rinətəgi pen ia kimiaha ramahatən kimiaha ia narimnari me pam. Nənə narimnari me nəha ramahatən kimiaha irə ro nipərhienien ripko mhə neikuəien. Ro iamɪnhi irə tihəpwit əknekɪn ia Kristo rəmwhen ia Nənimwɪn nəha rinahatən kimiaha irə.

Nipwnəti Kumwesən me

²⁸ Ouəh nipwnətik me. Tihəpwit əknekɪn ia Kristo mə nəpɪn in trier pehe irə kitaha tsəpwəh nehekiriien, ia nuveheien səvənhi kitaha tsəpwəh naurisien ia nənimen. ²⁹ Kimiaha hiəuvəukurən raka mə noien səvəi Kumwesən ratukwatukw. Ro iamɪnhi irə hiəuvəukurən mwi

2:25: Jon 3:15, 6:40

2:27: Jon 16:13

2:28: 1Jon 3:2, 4:17

2:29: 1Jon 3:7,10

mə nər̥mama səməmə kamho noien atukwatukw
irəha n̥pwnət̥in me.

3

Kumwesən rokeikei pik kitaha

¹ Hətoni ro Kumwesən rokeikei pik kitaha! Nokeikeien səvənhi rasori pik tukutaha ro pen in raməkwein kitaha mə n̥pwnət̥in me. Pər̥hien kitaha n̥pwnət̥in me. Nər̥mama səvəi t̥iprənə i həreirei kitaha ti nəri nə mə həreirei Kumwesən. ² N̥pwnət̥ik keikei me. Təkwtək̥wuni nəha kitaha səuvəuvehe raka mhəno n̥pwnət̥i Kumwesən me ia kitaha, mətə rəpwəh ihi noien nukurənien i mə tsəuvehe mhəfo irə. Mətə nari kuatia kitaha səukurən. Nəp̥in Kristo trier pehe irə, kitaha tsəuvehe mhəmwhen irə, ti nəri nə mə nəp̥in nəha kitaha tsətoni in ia nənimetaha. ³ Nər̥mama me pam səməmə kamhəmri pen əknek̥in nətərigien səvənraha ia Kristo mə tuhəuvehe mhəmwhen irə kamho noien səvənraha rəmher rəmwhen ia noien səvənhi rəmher.

⁴ Iərmama sə ramo noien ərəha in ramərui Loa səvəi Kumwesən. Iakani iam̥inhi ti nəri nə mə nəgkiariien i “noien ərəha” n̥pwr̥an i nər̥uien Loa səvəi Kumwesən. ⁵ Nənə kimiaha hiəukurən mə Kristo r̥iməier pehe mə truvehi raka noien ərəha me. Hiəukurən mə noien ərəha riwən irə. ⁶ Ro iam̥inhi irə iərmama sə rəpwit əknek̥in ia Kristo ko r̥ipkəm̥wur pen mhə ia noien ərəha. Iərmama sə raməm̥wur pen ia noien ərəha r̥ipkətə raka mhə Kristo m̥ipkukurən raka mhə mwi in.

3:1: Jon 1:12-13, Jon 16:3
5:21, 1Pit 2:22-24, 1Jon 2:2

3:2: 2Kor 3:18, Fil 3:21

3:5: 2Kor

3:6: Rom 6:1-2,14, 1Jon 3:9

⁷ Nipwnətik me. Tihəpwəh nəsənien iərmama riti reikuə ia kımiaha. Iərmama sə ramo noien atukwatukw, in iəmə atukwatukw rəmwhen ia Kristo in iəmə atukwatukw.

⁸ Iərmama sə raməmwur pen ia noien ərəha, in tini Setan, ti nəri nə mə fwe ia nukune narəien mauvehe Setan ramo noien ərəha. Nəri i in i Tini Kumwesən rıməier pehe tukwe mə trouraha noien me Setan ramo. ⁹ Iərmama sə in tini Kumwesən ko ripkəmwur pen mhə ia noien ərəha ti nəri nə mə nimiruien səvəi Kumwesən ruvəuvehe mīno raka kuatia irau nimiruien səvənhi. In tripkəmwur pen mhə ia noien ərəha ti nəri nə Kumwesən in Tata səvənhi. ¹⁰ Kitaha səfukurən mə nisimə nəha nipwnəti Setan, nisimə nəha nipwnəti Kumwesən? Noien i ramahatən pen. Iərmama sə ripko mhə noien atukwatukw, məpwəh nokeikeien piəvni ripko mhə in tini Kumwesən. In tini Setan.

Sokeikei kitaha me

¹¹ Nəgkiariien i in i kımiaha hiəuvəregi raka kinani fwe nukunen mə kitaha tsaməkeikei mhokeikei kitaha me. ¹² Kitaha tsəpwəh nəmwhenien ia Ken. In iərmama səvəi Setan. In rousi əpune piəvni anan. Ken rousi əpune piəvni ti nəfe? In rousi əpune ti nəri nə mə noien sə piəvni ramo ramasan, mətə noien sə in ramo rərəha. ¹³ Piak me, nənimemiaha trəpwəh nierien nəpin tihətoni nərmama səvəi tivrənə i kamhəmwəki kımiaha. ¹⁴ Kitaha səukurən mə səuvəier raka ia nemhəien mhəuvehe ia nimiruien. Səukurən nəri i ti nəri nə mə samokeikei piəvtaha me. Iərmama sə

3:7: 1Jon 2:29 **3:8:** Jon 8:44 **3:9:** 1Jon 5:18 **3:11:** Jon 13:34 **3:12:** Jen 4:8 **3:13:** Mat 5:11-12, Jon 5:18-19 **3:14:** Jon 5:24, 1Jon 2:11, Mat 5:21-22

nokeikeien riwən irə in ramarə ihi ia nemhəien.
¹⁵ Iərmama sə raməmwəki piəvni in rəmwhen
 ia iərmama sə ramousi əpune iərmama. Nənə
 kīmiaha hiəukurən mə iərmama sə ramousi əpune
 iərmama nimiruien rerin riwən irə.

¹⁶ Kitaha səfukurən nəri nokeikeien? Iesu
 Kristo rinahatən kitaha irə nəpin rinəseni pehe
 nimiruien səvənhi tukutaha. Nənə ratukwatukw
 mwi mə kitaha tsəseni pen nimiruien səkitaha ti
 piəvtaha me. ¹⁷ Trini minuə iərmama riti səvənhi
 narimnari me səvəi tīprənə i rasori rətə piəvni
 riti nari riwən tukwe, mətə in ramo nəri auər
 a irə, nokeikeien səvəi Kumwesən trəfo marə
 irə? ¹⁸ Nipwnətik me. Rərəha mə samokeikei
 nərmama ia tərhutaha a. Kitaha tsaməkeikei
 mhokeikei pərhiən irəha, mho narimnari me tr-
 asitu ia nirəha. ¹⁹ Trini minuə samo iamīnha
 irə, kitaha səukurən mə kitaha nərmama səvəi
 nipərhiənien. Nənə səukurən nuveheien ia nəmri
 Kumwesən reritaha fwe imwə rəpwəh nehekīrien.
²⁰ Nəri auər a mə səregi ia reritaha mə sənə noien
 riti rərəha, mətə tsəpwəh nehekīrien ti nəri nə
 mə Kumwesən in rasori məpi raka reritaha, nənə
 mukurən pam narimnari.

²¹ Nipwnətik keikei me. Trini minuə kitaha
 səregi ia reritaha mə səpko mhə noien riti
 rərəha, tsəpwəh nehekīrien ia nəmri Kumwesən.
²² Nənə nəfe nəghin kitaha tsəres, in truvehi
 pehe m kitaha, ti nəri nə mə samo nəgkiariien
 me səvənhi mine nəfe rerin ramagien tukwe.
²³ Nənə in i nəgkiariien səvənhi sə in riməni mə tso.

3:15: Rev 21:8 **3:16:** Jon 13:1, Kal 1:4, 1Tes 2:8 **3:17:** Dut
 15:7 **3:18:** Jem 2:15-16 **3:21:** Hip 4:16 **3:22:** Mat 21:22
3:23: Jon 6:29, 13:34

Kıtaha tsaməkeikei mhəni nıpərhiendien ia nəghi Tini, Iesu Kristo, nənə mamhokeikei kıtaha me rəmwhen in ruvəni raka tukutaha i. ²⁴ İərmama sə ramo nəgkiariien me səvənhi rəpwit əknekın ia Kumwesən, nənə Kumwesən rəpwit əknekın irə. Kıtaha səfukurən mə Kumwesən rəpwit əknekın ia kıtaha? Nənimwın sə in rıməuvei pehe m kıtaha ramo kıtaha səukurən.

4

Nətə sasien ia nənimwın me

¹ Nıpwınətık keikei me. Tihəpwəh niniien nıpərhiendien ia profet me pam, mətə tihəkupwən mhətə sas raka ia nırəha mə nənimwın sə ramarə ia nırəha ruku pen pərhiien ti Kumwesən uə rekəm. İakani iamınhi irə ti nəri nə mə profet eikuə me həpık həuvavən pam ia tənəmtənə me. ² Noien nəha sə tro kimiaha hiəregi sas mə nənimwın səvəi Kumwesən ramarə ia iərmama ro iamınhi irə. Trini minuə iərmama rani mə nəpın Iesu Kristo rıməuvehe ia tıprənə i nıpwran rəmwhen ia nıpwrai iərmama, iərmama nəha Nənimwın sə raku pen ti Kumwesən ramarə irə. ³ Mətə nərmama me pam səməme həpwəh nini irapwien Iesu Nənimwın səvəi Kumwesən rıpkarə mhə ia nırəha. Nənimwın sə ramarə ia nırəha nənimwın səvəi iərmama sə raməmwəki pık Kristo. Kimiaha hiəuvəregi raka mə iərmama nəha truvehe, mətə təkwtəkwni nəha nənimwın səvənhi ruvəuvehe raka ia tıprənə i.

3:24: Rom 8:9, 1Jon 4:13 **4:1:** Mat 7:15, 1Jon 2:18, 2Jon 7, 1Tes 5:21 **4:2:** 1Kor 12:3 **4:3:** 1Jon 2:18, 2Jon 7

⁴ Nipwnətik me. Kimiaha nə nərmama me səvəi Kumwesən. Hiəuvəuvehi irapw raka niskaiien səvəi profet eikuə me nəha ti nəri nə mə Nənimwīn sə ramarə ia kimiaha niskaiien səvənhi rasori məpi raka nənimwīn sə ramarə ia tīprənə i. ⁵ Irəha nərmama səvəi tīprənə, ro pen nəgkiariien səvənraha səvəi tīprənə, nənə nərmama səvəi tīprənə kamhətərig ia nirəha. ⁶ Mətə kitaha nərmama me səvəi Kumwesən. Ro iamīnhi irə iərmama sə rukurən Kumwesən ramətərig ia kitaha, mətə iərmama rīpko mhə in iərmama səvəi Kumwesən in rəpwəh nətərigien ia kitaha. Noien i ro kitaha sətə sas Nənimwīn sə rani nīpərhienien mīne nənimwīn sə rameikuə.

Kumwesən rīməkupwən mokeikei kitaha

⁷ Nipwnətik keikei me. Pwəh kitaha sokeikei kitaha me ti nəri nə mə nokeikeiien raku pen ti Kumwesən. Iərmama sə ramo nokeikeiien in tini Kumwesən in rukurən Kumwesən. ⁸ Iərmama sə nokeikeiien səvənhi riwən in rīreirei Kumwesən ti nəri nə mə Kumwesən in nukune nokeikeiien. ⁹ Kumwesən rīnəfo mo kitaha sətəni nokeikeiien səvənhi? In rīnərhi pehe Tini anan kuatia ruvehe ia tīprənə i mo suatuk m kitaha səuvehi nīmīruien irə. ¹⁰ Nəri i in nokeikeiien pərhiēn. Rīpko mhə kitaha sənəkeikei Kumwesən, mətə Kumwesən rīnokeikei kitaha, mərhi pehe Tini remhə nīten raikuas raka noien ərəha me səkītaha. ¹¹ Nipwnətik keikei me. Kumwesən rokeikei pīk kitaha ro iamīnhi irə kitaha mwī tsaməkeikei

4:4: Mat 12:29, 1Jon 5:4-5 **4:5:** Jon 15:19 **4:6:** Jon 8:47
4:7: 1Jon 2:29 **4:8:** 1Jon 4:16 **4:9:** Jon 3:16 **4:10:** Rom 5:8-10, 1Jon 2:2 **4:11:** Mat 18:33

mhokeikei kitaha me. ¹² Iærmama riti ripkætoni raka mhæ Kumwesæn. Mætæ mæ kitaha samokeikei kitaha me, Kumwesæn ræpwit æknekin ia kitaha, nænæ nokeikeien sævænhi ruvehe matukwatukw pam ia kitaha.

¹³ Kitaha sæfukuræn mæ sæpwit æknekin ia Kumwesæn in ræpwit æknekin ia kitaha? Kitaha sæukuræn ti næri næ mæ in rimæuvei pehe Nænimwîn sævænhi m kitaha. ¹⁴ Nænæ kîmaha iahænætoni raka mamhæni irapw mæ nîpærhienien Tata Kumwesæn rinærhi pehe Tini ruvehe mæ truvehimîru nærmama ia tîprænæ. ¹⁵ Iærmama sæ rani irapw mæ Iesu in Tini Kumwesæn, Kumwesæn ræpwit æknekin iræ, nænæ in mwi ræpwit æknekin ia Kumwesæn. ¹⁶ Kitaha sæuvæukuræn raka nokeikeien i Kumwesæn ramo m kitaha, sæuvæuvehe raka mhæni nîpærhienien iræ. Kumwesæn in nukune nokeikeien. Ro iamînhi iræ iærmama sæ ramaræ ia nokeikeien in ræpwit æknekin ia Kumwesæn, Kumwesæn ræpwit æknekin iræ. ¹⁷ Næpîn nokeikeien ruvehe matukwatukw pam ia kitaha, noien i tro kitaha sæpwæh nehekîrien ia næpîn Kumwesæn trærpwîn noien æræha me iræ sævæi nærmama. Kitaha tsæpwæh nehekîrien næpîn næha, ti næri næ mæ ia tîprænæ i noien sækitaha ræmwhen ia noien sævæi Kristo. ¹⁸ Iærmama sæ ramokeikei Kumwesæn ko ripkhekîr mhæ in. Næpîn kitaha sæukuræn amasan mæ Kumwesæn ramokeikei kitaha, kitaha tsæpwæh nehekîrien. Iærmama ramhekîr ti næri næ mæ rerîn ramrhi nærpwînien næha Kumwesæn tro, mætæ

4:12: Jon 1:18, 1Jon 2:5-6
Jon 3:17

4:13: 2Kor 1:22, 1Jon 3:24

4:14:

4:15: 1Jon 5:5

4:16: 1Jon 4:8

4:17: 1Jon 2:28

iærmama sə ramhekɪr iamɪnhi irə rɪpkukurən amasan mhə ihi mə Kumwesən ramokeikei in.

¹⁹ Kitaha samokeikei kitaha me ti nəri nə mə Kumwesən rɪmækupwən mokeikei kitaha.

²⁰ Trɪni mɪnuə iærmama riti rɪni mə ramokeikei Kumwesən, mətə raməmwəki ihi piəvni, in ieikuə riti. Iærmama sə rəpwəh nokeikeien piəvni sə ramətoni ia nənimen in ko rɪpkokeikei mhə Kumwesən sə rɪpkətoni mhə. ²¹ Nənə nəgkiariien i in i Iesu rɪməuvei pehe m kitaha. Iærmama sə ramokeikei Kumwesən traməkeikei mokeikei mwi piəvni.

5

Iærmama sə rani nɪpərhienien ia Iesu Kristo

¹ Nærmama me pam səməme kamhəni nɪpərhienien ia Iesu mə in Kristo sə Kumwesən rɪməni mə trərhi pehe i, irəha nɪpwnəti Kumwesən me. Nənə kimiaha hiəukurən mə iærmama sə ramokeikei tata riti in ramokeikei mwi nɪpwnətin me. ² Kitaha tsəfukurən mə samokeikei pərhien nɪpwnəti Kumwesən me? Trɪni mɪnuə samokeikei Kumwesən, nənə mamho nəgkiariien me səvənhi, noien nəha ramahatən pen mə kitaha samokeikei pərhien irəha. ³ Trɪni mɪnuə samokeikei Kumwesən nɪpwrən i tsamo nəgkiariien me səvənhi. Nənə nəgkiariien me səvənhi həpkɪpam mhə tukutaha, ⁴ ti nəri nə mə kitaha pam nɪpwnəti Kumwesən me saməuvehi irapw nɪskaiien səvəi noien ərəha me kamo ia tɪprənə i. Nəri sə saməskai irə rauvehi irapw nɪskaiien səvəi noien ərəha me

4:21: Mat 5:44-45, Mak 12:29-31 **5:1:** 1Jon 4:15 **5:3:** Jon 14:15,23-24, 2Jon 6, Mat 11:30 **5:4:** Jon 16:33

kamo ia tɪprənə i in i nahatətəien səkitaha. ⁵ Sin ko ruvehi irapw niskaiien səvəi noien ərəha me kamo ia tɪprənə i? Iərmama sə rani nɪpərhiienien mə Iesu in Tini Kumwesən, iərmama nəha in əpa ko ruvehi irapw niskaiien səvəi noien ərəha me kamo ia tɪprənə i.

⁶ Iesu Kristo in iərmama sə rıməuvehe ko paptaes irə ia nui marə memhə mwi niten raiu. Rɪpko mhə in iərmama sə rıməuvehe ko paptaes əpa irə ia nui, rekəm. Mətə in iərmama sə rıməuvehe ko paptaes irə ia nui marə memhə mwi niten raiu. Nənımwɪn Ikinan rani irapw mə nəri nəha ro nɪpərhiienien, tɪ nəri nə mə Nənımwɪn Ikinan in nukune nɪpərhiienien. ⁷ Nəri kahar hamarni irapw nəri nəha mə ro nɪpərhiienien, ⁸ Nənımwɪn Ikinan mine nui mine netə. Nənə nəgkiariien səvənrahar kwatia. ⁹ Nəpɪn me kitaha saməni nɪpərhiienien ia nəgkiariien səvəi iərmama, mətə nəgkiariien səvəi Kumwesən ro nəgsen məpi raka, tɪ nəri nə mə nəgkiariien nə nəgkiariien səvəi Kumwesən. Nənə in ruvəuvei pehe raka nəgkiariien səvənhi raməgkiari ia Tini. ¹⁰ Iərmama sə rani nɪpərhiienien ia Tini Kumwesən rauvehi nəgkiariien nəha ia rerɪn. Mətə iərmama sə rɪpkɪni mhə nɪpərhiienien ia Kumwesən, in rani Kumwesən mə ieikuə riti, tɪ nəri nə mə in rɪpkɪni mhə nɪpərhiienien ia nəgkiariien sə Kumwesən ruvəuvei pehe raka raməgkiari ia Tini. ¹¹ Nəfe nəha nəgkiariien? Nəgkiariien i in i. Kumwesən rıməuvei pehe nɪmɪruien rerɪn m kitaha, nənə nɪmɪruien nəha saməuvehi ruku pen tɪ Tini.

5:5: Rom 8:37, 1Jon 4:4 **5:6:** Jon 1:29-34; 19:34 **5:8:** Jon 15:26 **5:9:** Jon 5:32-37; 8:18 **5:10:** Kal 4:6

12 Iærmama sə rauvehi Tini Kumwesən rauvehi mwi nimiruien, mətə iærmama sə ripkuvehi mhə Tini Kumwesən ripkuvehi mhə nimiruien.

Nimiruien rerin

13 Iakamrai nægkiariien me i rauvehe tuku-miaha. Kimiaha nærmama səməme hiaməni niperhienien ia næghi Tini Kumwesən. Iakokeikei mə kimiaha tihəukurən mə hiəuvəuvehi raka nimiruien rerin. 14 Nənə təkwtəkwuni, trini minuə kitaha səfwaki m Kumwesən, nari riti nəha ikin ramasitu ia kitaha mə tsəpwəh nehekiriien. Nəri nəha in i Kumwesən ruvəni raka mə triregi nəfwakiien səkitaha, mətə nəfwakiien səkitaha traməkeikei mhesi pen atukwatukw nətərigien səvənhi mine nəfe in rokeikei mə tro. 15 Trini minuə səukurən mə in triregi nəfwakiien səkitaha, nəfe nəghin tsəres in i, nənə səuvəukurən raka mə tsəuvehi.

16 Trini minuə kimiaha riti rətoni piəvni riti ramo noien ərəha mətə ripko mhə noien ərəha sə ramiri pen in mə tremhə, kimiaha tihəfwaki tukwe pwəh Kumwesən ruvei pen nimiruien min. Mətə noien ərəha riti nəha ikin sə ramiri pen iærmama mə tremhə. Nənə iou iapkini mhə mə tihəfwaki ti nærmama səməme kamho noien ərəha nəha. 17 Nærmama me pam səməme kamho noien sə ripkatukwatukw mhə kamho noien ərəha, mətə noien ərəha me nepwin nəha ikin səməme həpkiri pen mhə irəha mə tuhemhə.

18 Kitaha səukurən mə iærmama sə in tini Kumwesən, Tini Kumwesən atukwatukw rauvehi amasan in. Ro iaminh i irə iærmama nəha ko

ripkəmwur pen mhə ia noien ərəha, iəremhə ərəha Setan rīreirei nīrapiien in. ¹⁹ Kitaha səukurən mə kitaha nīpwnəti Kumwesən me, mətə nərmama səvəi tīprənə irəha pam kamharə ia rəgi iəremhə ərəha Setan. ²⁰ Kitaha səukurən mwi mə Tini Kumwesən rīməuvehe, muvei pehe nukurəniēn m kitaha mə tsəukurən Kumwesən i Kumwesən pərhiēn. Nənə kitaha səuvəuvehe raka mhəpwit əknekīn ia Kumwesən nəha. Iakani iamīnhi irə tī nəri nə mə səpwit əknekīn ia Tini, Iesu Kristo. In nə Kumwesən pərhiēn. In nə nīmīruēn rerīn.

²¹ Nīpwnətīk me. Tihətui amasan tukumiaha me mhəpwəh nəfwakiēn m nənīmwi nari me.

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416